

Sumáriu Kazu

Tribunál Judisiál Primeira Instáncia Suai

Dezembu 2024

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Suai

1. Totál kazu ne'ebé JSMP monitoriza : 8

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	2
Artigu 177 KP	Abuzu seksuál ba menór	2
Artigu 177 KP no artigu 182 KP	Abuzu seksuál ba menór ho agravasaun	1
Artigu 171 KP no artigu 182 KP	Koasaun seksuál ho agravasaun	1
Artigu 172 KP no artigu 183 KP	Violasaun seksuál no devasa	1
Artigu 172, 173 KP no 2, 3 (c), 35 (b) no 36 LKVD	Violasaun seksuál ho agravasaun no natureza VD	1
Totál		8

2. Totál desizaun ne'ebé JSMP monitoriza: 6

Tipu pena	Artigu	Númeru
Suspensaun ba prizaun	68 KP	2

nia ezekusaun		
Pena multa	67 KP	1
Pena prizaun	66 KP	1
Absolve		2
Totál		6

2. Totál kazu sira ne'ebé kontinua prosesu tuir JSMP nia monitorizasaun: 7

B. Deskrisaun sumáriu ba desizaun kazu sira ne'ebé JSMP monitoriza

1. Krime ofensa ba integridade fízika simples ho natureza violénsia doméstika

Nú. Prosesu : 0002/24.ANANV
 Kompozisaun Tribunál : Singulár
 Juis : Dr. Nasson Armindo Marques Doutel Sarmento
 Prokuradór : Dr. Rafael Jeronimo Gusmão
 Defeza : Dr. Angelmo Pinto
 Desizaun : Pena multa US\$60.00

Iha 02 Dezembru 2024, Tribunál Judisiál Primeira Instánsia Suai, prezide leitura sentensa ba krime ofensa ba integridade fízika simples ho natureza VD ne'ebé envolve arguidu CMdA hasoru nia feen, iha Munisípiu Ainaro.

Akuzasaun Prokuradór

Prokuradór akuza katak iha 02 Janeiru 2024, iha oras tuku 8:30 dadeer, arguidu lori ai soru tais nian baku dala rua iha ofendida nia ain kabun parte karuk no basa dala ida iha ofendida nia ulun no rezulta moras. Antes ne'e, ofendida deskonfia arguidu iha relasaun amante (*selingkuh*) ho feto seluk, tanba ofendida haree arguidu nia telefone iha mensagem ne'ebé tama bolu arguidu ho liafuan doben. Nune'e ofendida husu tuir arguidu kona-ba mensagem ne'e sira diskute malu no mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu hili direitu nonook. Entretantu ofendida kontinua konfirma faktu sira hotu iha akuzasaun, depoisde akontesimentu liu oras balun di'ak malu kedas no to'o agora arguidu labaku ona ofendida no ofendida mós perdua ona arguidu.

Alegasaun finál

Prokuradór haktuir katak, mezmu iha julgamentu arguidu hili direitu nonook maibé ofendida kontinua konfirma faktu sira iha akuzasaun. Prokuradór avalia katak kazu la'en baku feen ne'e aas tebes, tanba ne'e atu halo prevensaun ba krime refere husu ba tribunál atu kondena arguidu ho pena prizaun suspende nia ezekusaun. Entretantu, defeza husu ba tribunál atu decide tuir konviksaun tribunál nian.

Desizaun

Depoisde avalia faktu sira hotu, tribunál prova katak arguidu lori ai soru tais nian baku dala rua iha ofendida nia ain kabun parte karuk no basa dala ida ofendida nia ulun no resulta ofendida sofre moras iha fatin hirak ne'ebé arguidu halo ofensa ba.

Bazeia ba faktu provadu sira ne'e no tetu mós ho sirkustánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$60.00 ne'ebé kada loron arguidu sei selu US\$1.00 durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

2. Krime abuzu seksuál ba menór no agravasaun

Nú. Prosesu : 0006/23.CVFTK
Kompozisaun Tribunál : Koletivu
Juis : Dr. Hugo da Cruz Pui, Dr. Naason Mário Armindo
Marques Doutel no Yudi Pamukas
Prokuradór : Dr. Nelson J.S Magno
Defeza : Dr. Albano Maia (Advogadu Privadu)
Desizaun : Pena prizaun tinan 6 fulan 8

Iha 4 Dezembru 2024, Tribunál Judisiál Primeira Instánsia Suai, prezide leitura akordaun ba krime abuzu seksuál ba menór ne'ebé envolve arguidu DdC hasoru ofendida (idade tinan 10), iha Munisípiu Covalima.

Akuzasaun Prokuradór

Prokuradór akuza katak, iha 19 Novembru 2023, iha oras tuku 19:00 kalan, ofendida hosi nia uma atu ba nia avo nia uma ho objetivu atu foti farda eskola nian. Hafoin arguidu la'o tuir ofendida hosi kotuk ofendida sente ta'uk no halai maibé arguidu mós halai tuir ofendida no toman ofendida no hako'ak kedas ofendida no lao ba ofendida nia avo nia varanda oin tanba udan boot. Hafoin arguidu haruka ofendida tuur iha arguidu nia hiti leten hodi rei ofendida nia inus, supa ofendida ninia nanal no tata ofendida ninia nanal to'o kanek. Arguidu kontinua hatama liman ba ofendida nia kalsa laran hodi kaer ofendida nia orgaun seksuál ne'ebé resulta ofendida sente moras. Arguidu mós dada ofendida nia liman hodi haruka kaer arguidu nia orgaun seksuál no arguidu dehan ba ofendida atu labele hateten ba ofendida nia inan kona-ba arguidu nia aktu ne'e. Depoisde halo tiha aktu ne'e, arguidu halai fila ba ninia uma no husik ofendida hela mesak iha ne'eba. Ofendida tanis no bolu ofendifa ninia avo hodi loke odamatan no ofendida tama ba laran. Aktu ne'e halo ofendida trauma, moe no ofendida sente moras iha ninia orgaun seksuál. Kazu ne'e aneksa hamutuk ho rezultadu ezaminaun médiiku hosi PRADET.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o 15 no artigu 182 KP kona-ba agravasaun.

Produsaun ba prova sira

Iha prosesu julgamentu, arguidu deklara katak momentu ne'eba arguidu hosi mate uma atu fila ba ninia uma no ofendida mak bolu arguidu hein ofendida. Nune'e arguidu hein ofendida hodi la'o hamutuk no arguidu haku'ak ofendida nia kabaas hodi la'o no derepente udan boot arguidu ho ofendida ba tuur iha mestri JdS nia uma varanda no momentu ne'eba ahi mate. Hafoin ofendida leno nia lampra telefone nian la'o ba mai iha arguidu nia oin, ofendida husu arguidu atu fila ona maibé arguidu dehan hein uituan udan para mak ba ofendida nia uma. Bainhira udan para arguidu ho ofendida la'o tun eskada mak kaer ofendida nia orgaun seksuál kaer de'it maibé la buti no lahatama liman ba ofendida nia orgaun seksuál. Depois sira la'o tuir malu ofendida ba nia avo nia uma no arguidu ba ninia uma. Bainhira arguidu seidak to'o iha ninia uma ofendida nia maun telefone ba arguidu hodi dehan "*ó halo saida ba hau nia alin mak nia tanis ne'e ó fila ita resolve lai!*". Arguidu mós fila ba iha fatin akontesimentu no ofendida ko'alia fali kona-ba akontesimentu. Arguidu rekoñese katak hahalok ne'e la di'ak, arrepende ninia hahalok no promete iha futuru sei lakomete tan krime hanesan, arguidu mós deklara katak foin primeiravés mai hatan iha tribunál.

Iha parte seluk, ofendida kontinua konfirma faktu sira iha akuzasaun no deklara katak momentu arguidu hatama liman ba ofendida nia kalsa laran hodi buti ofendida ninia orgaun seksuál ne'e ofendida sente moras. Depois liu tiha oras balun bainhira ofendida ba soe bee ki'ik la sente moras ona. Ofendida deklara tan katak sente ta'uk no trauma ho arguidu nia hahalok no iha tribunál mós ofendida haree arguidu sente moe no ta'uk nafatin.

Testemuña JdC hanesan arguidu nia rian, depoimenta katak nia la iha kuñesimentu ba kazu ne'e, maibé momentu iha mate uma ema hotu-hotu temi arguidu nia naran dehan arguidu book ofendida. Tanba ne'e arguidu nia alin telefone no arguidu fila mai no husu ofendida maibé ofendida kontinua dehan katak arguidu buti ofendida nia orgaun seksuál.

Alegasaun finál

Prokuradór haktuir katak iha produsaun ba prova arguidu deklara katak apenas kaer de'it ofendida nia orgaun seksuál, labuti no lahatama liman ba ofendida ninia orgaun seksuál, Maibé iha ofendida ninia deklarasaun kontinua konfirma faktu sira hotu iha akuzasaun no reforsa hosi testemuña katak momentu arguidu fila mai husu ofendida ne'e ofendida deklara katak arguidu kaer ofendida nia orgaun seksuál.

Prokuradór konsidera arguidu nia aktu ne'e priense elementu hosi krime ne'ebé preve iha artigu 177 KP, tanba ne'e husu ba tribunál atu kondena arguidu ho pena prizaun tinan ualu fulan neen.

Entretantu, defeza haktur katak arguidu deklara de'it faktu ne'ebé nia komete, entretantu kona-ba faktu sira seluk defeza hanoin katak tanba mosu ona problema dala

ruma ofendida inventa faktu balun hodi hatodan arguidu. Arguidu mós deklara katak arrepende ninia hahalok no rekonése katak hahalok ne'ebé arguidu halo ne'e ladi'ak no foin primeiravés mai hatan iha tribunál. Arguidu iha oan na'in tolu, tanba ne'e husu ba tribunál atu kondena arguidu ho pena prizaun suspende ninia ezekusaun.

Desizaun

Depoisde avalia faktu hotu, tribunál prova katak arguidu komete krime abuzu seksuál hasoru ofendida. Mezmu iha julgamentu arguidu konfesa parsialmente maibé tribunál fiar liu ba ofendida nia deklarasaun katak arguidu halo duni aktu refere hasoru ofendida.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan neen fulan ualu.

3. Krime abuzu seksuál ba menór

Nú.Prosesu	: 0005/23.ANHTU
KompozisaunTribunál	: Koletivu
Juis	: Dr. Samuel da Costa Pacheco, Dr. Hugo da Cruz Pui no Dr. Nasson. M. Armindo. M. D. Sarmiento
Prokuradór	: Dr. Rarafael Jeronimo Gusmão
Defeza	: Dr. Domingos dos Santos
Desizaun	: Absolve

Iha 10 Dezembru 2024, Tribunál Judisiál Primeira Instánsia Suai, prezide leitura akordaun ba krime abuzu seksuál ba menór ne'ebé envolve arguidu DdCA hasoru ofendida (idade tinan 13), iha Munisípiu Ainaro.

Akuzasaun Prokuradór

Prokuradór akuza katak iha 23 Marsu 2023, iha oras tuku 23:00 kalan, arguidu telefone ba ofendida nia bin no haruka ofendida atu hasoru arguidu iha aréa debu nian. Nune'e ofendida mós sai hosi uma ba hasoru arguidu no iha hasoru malu ne'e arguidu hateten ba ofendida katak atu moris hamutuk hanesan feen la'en Maibé ofendida rejeita, enkuantu arguidu nafatin insiste no hateten katak *“se ó isin rua hau sei ba ó nia uma no prontu responsavel,”*. Tanba ne'e ofendida mós konkorda hafoin arguidu hasai tiha ofendida nia rupa no arguidu mós hasai ninia rupa hodi halo relasaun seksuál ho ofendida. Depoisde halo tiha relasaun seksuál arguidu ho ofendida ida-idak hatais fila fali ida-idak ninia rupa no fila ba uma.

Tuir mai iha 24 Marsu 2023, iha oras tuku 00:00 kalan, arguidu kontaktu ofendida hodi hasoru malu iha fatin hanesan. Iha hasoru malu ne'e arguidu ho ofendida kontinua halo relasaun seksuál, depoisde halo relasaun seksuál hotu ida-idak hatais nia rupa fila ba uma

Iha 25 Marsu 2023, iha oras tuku 13:00 madrugada, arguidu kontaktu ofendida hodi hasoru malu iha fatin hanesan. Iha hasoru malu ne'e arguidu hasai ofendida nia rupa hodi halo relasaun seksuál ho ofendida.

Tuir mai iha 12 Abril 2023, iha oras tuku 01:30 madrugada, arguidu ho ofendida kontaktu malu hodi hasoru malu iha duut laran besik gruta. Iha hasoru malu ne'e arguidu no ofendida kontinua halo relasaun seksuál.

Iha akontesimentu ikus iha 20 Abril 2023, iha oras tuku 03:00 madrugada, arguidu ho ofendida nafatin kontaktu malu hodi hasoru malu iha fatuk ku'ak laran. Iha hasoru malu arguidu no ofendida kontinua halo relasaun seksuál. Kazu ne'e aneksu aneksu hamutuk ho relatoriu médiku hosi PRADET.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o tinan 20.

Produsaun ba prova sira

Iha julgamentu, arguidu nega faktu hotu iha akuzasaun no deklarata katak momentu ne'eba ofendida mak miskol arguidu no arguidu telefone fali ofendida hodi konversa halimar ho ofendida no ofendida husu arguidu atu sosa ofendida ninia sim card telemor foun. Arguidu deklarata katak depoisde arguidu sosa tiha simkar telemor foun. Arguidu telefone ofendida ba hasoru malu hodi fó tiha sim card ba ofendida no arguidu fila ba ninia uma no nungka hasoru malu tan ho ofendida. Arguidu deklarata tan katak momentu ofendida isin rua ba husu arguidu maibé arguidu lahate tanba nunca halo relasaun ho ofendida.

Iha parte seluk ofendida kontinua konfirma faktu sira iha akuzasaun no deklarata katak momentu ne'eba arguidu foti nomor hosi ofendida nia kolega eskola hodi telefone ofendida katak arguidu gosta ofendida. Ofendida mós simu arguidu sai ofendida nia namorada no iha momentu ne'ebá arguidu hakarak kuñese malu ho ofendida, nune'e kalan ne'e ofendida ba hasoru arguidu. Ofendida deklarata liután katak momentu halo relasaun seksuál primeiru ne'e sente moras no raan sai no bainhira atu halo tan relasaun seksuál daruak arguidu telefone atu hasoru malu tan. Mezmua ofendida sente ninia orgaun seksuál sei moras hela maibé arguidu hatete ba ofendida tenke hasoru malu ho arguidu. Nune'e ofendida ba hasoru malu duni ho arguidu hodi halo relasaun seksuál no akontesimentu sira tuir mai hanesan dezkreve ona iha akuzasaun. Ofendida deklarata liután katak momentu ba eskola oin nakukun no monu ba rai nune'e mestra sira lori ofendida ba ospítal no dehan katak ofendida isin rua. Tanba ne'e ofendida fó hatene ba ninia inan aman ba hasoru arguidu maibé arguidu nega fali bebe iha ofendida nia isin. Ofendida deklarata liután katak halo relasaun seksuál ho arguidu de'it no nunca halo relasaun seksuál ho mane seluk.

Depoisde rona ofendida nia deklarasaun defeza hato'o ninia pedidu ba tribunál atu halo teste DNA. Tanba bazeia ba deklarasaun hosi arguidu ho ofendida nian katak arguidu nunca halo relasaun seksuál ho ofendida no ofendida mós deklarata katak nunca halo relasaun seksuál ho mane seluk.

Relasiona ho pedidu ne'e, prokuradór mós konkorda no tribunál koletivu simu no tribunál hato'o ba PSIC hodi halo teste DNA.

Alegasaun finál

Prokuradór haktuir katak iha prosesu julgamentu arguidu deklara katak nunca halo relasaun seksuál ho ofendida. Iha parte seluk, ofendida kontinua konfirma faktu sira iha akuzasaun katak ofendida halo de'it relasaun seksuál ho arguidu no nunca halo relasaun seksuál ho ema seluk. Tanba ne'e prokuradór husu ba tribunál atu decide tuir konviksaun tribunál nian.

Entretantu, defeza haktuir katak arguidu deklara katak nunca halo relasaun seksuál ho ofendida, nune'e defeza husu ba tribunál atu decide tuir prova ne'ebé produs iha julgamentu.

Desizaun

Depoizde avalia faktu sira hotu no bazeia ba deklarasaun arguidu ho ofendida ninian ne'ebé la hanesan no bazeia mós ba rezultadu DNA ne'ebé diferente ho ofendida nia deklarasaun.

Alende ne'e, tribunál konfere ho rezultadu teste DNA no hatudu katak teste DNA negativu. Ne'e katak bebe ne'ebé ofendida kous ne'e laos arguidu nia oan, tanba ne'e halo tribunál duvida hodi absolve arguidu hosi krime ne'e.

4. Krime violasaun seksuál no devasa

Nú. Prosesu	: 0039/24.CVSUI
Kompozisaun Tribunál	: Koletivu
Juis	: Dr. Samuel da Costa Pacheco, Dr. Hugo da Cruz Pui no Dr. Nasson Mario Armindo Marques Doutel Sarmento
Prokuradór	: Dr. Rafael Jeronimo Gusmão
Defeza	: Dr. Albano Maia (Advogadu Privadu)
Desizaun	: Absolve

Iha 10 Dezembru 2024, Tribunál Judisiál Primeira Instánsia Suai, prezide leitura akordaun ba krime violasaun seksuál no devasa ne'ebé envolve arguidu SAF hasoru ofendida (relasaun namora), iha Munisípiu Covalima.

Akuzasaun Prokuradór

Prokuradór akuza katak iha 14 Feveireiru 2024, iha oras tuku 16:00 lokraik, arguidu haruka nia alin CM ba tula ofendida atu ba foti livru. Maibé arguidu nia alin lori fali ofendida ba iha arguidu nia uma. Bainhira to'o iha uma arguidu haruka nia alin CM tama liu ba uma laran no ofendida mesak tuur ho arguidu iha varanda. Hafoin arguidu haruka ofendida tama ba uma laran maibé ofendida lakohi, mezmú nune'e arguidu obriga dada ofendida ba uma laran ba liu kuartu laran. Iha kuartu laran arguidu obriga ofendida atu hasai ofendida nia roupa maibé ofendida nafatin lakohi, arguidu obriga rein ofendida niaibun no dudu ofendida ba iha kama leten hasai ofendida nia roupa no hateten ba ofendida katak "*hau hola ó*". Mezmú ofendida lakohi, maibé arguidu kontinua hasai

ofendida nia roupa no arguidu hahú supa ofendida nia ibun no rein ofendida nia orgaun sensitivu inklui hirus-matan hodi halo relasaun seksuál ho ofendida.

Tuir mai iha 25 Feveireiru 2024, iha oras tuku 10:00 dadeer, ofendida sai hosi misa arguidu hein ofendida iha merkadu no tula ofendida ba iha arguidu ninia uma. Bainhira to'o iha uma arguidu lori tama ofendida ba arguidu nia kuartu laran, arguidu latan ofendida ba iha kama leten arguidu hasai nia roupa no hit sae ofendida nia vistidu maibé ofendida satan netik, nune'e ofendida ho arguidu rasta malu ofendida nia relozu monu ba rai. Ofendida lori nia liman sikun parte karuk fai ba arguidu nia hasan no ofendida halai sai ba liu iha estrada. Arguidu tula nia alin CM halai tuir ofendida hodi tula ofendida fila ba ninia uma.

Depoisde akontesimentu ne'e arguidu tula ofendida nia prima lori ba arguidu nia uma, nune'e ofendida husu arguidu maibé arguidu hatan dehan arguidu nia subriña no hosi ne'e ofendida fó para tiha arguidu no sira laiha ona relasaun namora, nune'e liu tiha, arguidu mós manda kedas vidio ne'ebé arguidu halo no haruka kedas ba arguidu nia kolega no arguidu mós manda ofendida ninia fotografia molik ba arguidu nia kolega refere. Alende ne'e arguidu mós fahe tutan ba iha WA eskola nian no facebook. Aktu ne'e rezulta ofendida lakon nia virjen no sente moe ba ninia kolega sira iha eskola no família.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15 no artigu 183 KP kona-ba devasa ho moldura penál tinan 1 ka multa.

Produsaun ba prova sira

Bazeia ba artigu 262 KP kona-ba tentativa ba konsiliaun ba kazu krime devassa tanba nia natureza semi publiku. Nune'e tribunál halo tentativa konsiliaun ba arguidu no ofendida. Ofendida konkorda dada fali nia keixa hasoru arguidu ba krime devasa no arguidu mós konkorda ho pedidu dezisténsia keixa hosi ofendida no husu kedas deskulpa ba ofendida. Enkuantu ba krime violasaun seksuál tribunál kontinua halo julgamentu.

Iha prosesu julgamentu, arguidu deklara katak akontesimentu iha 14 Feveireiru 2024, arguidu ho ofendida iha relasaun namora no momentu ne'eba arguidu nia alin mak lori ofendida ba iha uma no arguidu ho ofendida halo relasaun seksuál ho konsentimentu hadomi malu mak halo relasaun seksuál. Tuir fali mai iha 25 Feveireiru 2024, arguidu ba tula ofendida iha ninia uma no lori ba misa no bainhira sai hosi misa arguidu tula ofendida ba iha arguidu nia uma, maibé ofendida dehan katak atu ba halimar iha ofendida nia uma. Tanba ne'e, arguidu ho ninia alin CM inklui ofendida ba iha ofendida nia uma to'o lokraik mak arguidu ho nia alin CM fila ba sira ninia uma. Arguidu repete tan katak ho ofendida iha relasaun namora no halo relasaun seksuál ne'e ho konsentimentu la obriga.

Alende ne'e, ofendida mós deklara katak ho arguidu iha relasaun namora, iha akontesimentu ne'e arguidu nia alin mak tula ofendida ba iha uma atu foti livru. Maibé bainhira to'o iha uma arguidu ho nia tiu sira iha uma no arguidu nia alin CM tama liu ba uma laran, ofendida ho arguidu mak tuur iha varanda no arguidu haruka ofendida tama ba uma laran no ofendida mós tama ba uma laran ba liu arguidu nia kuartu. Ofendida deklara katak momentu halo relasaun seksuál ho arguidu ne'e ho konsentimentu no arguidu la obriga ofendida maibé hakarak ho hakarak.

Ofendida deklara liután katak tuir loloos sei namora ho arguidu maibé tanba arguidu tula fali ofendida nia prima halai liu ofendida nia oin no ofendida husu tuir maibé arguidu bosok dehan nia alin, nune'e ofendida deside fó para arguidu no hakotu sira nia relasaun namora. Depoisde ne'e ofendida nia maun haree hetan ofendida ho arguidu nia vidio seksuál iha facebook, nune'e fó hatene ba ofendida ba apresenta keixa hasoru arguidu.

Alegasaun finál

Prokuradór haktuir katak relasaun seksuál ne'e akontese tanba hakarak ho hakarak no konfirma mós hosi ofendida, nune'e prokuradór husu ba tribunál atu kondena arguidu tuir prova sira ne'ebé mak produs durante julgamentu.

Entretantu, defeza haktuir katak iha julgamentu arguidu ho ofendida deklara katak sira iha relasaun namora no relasaun seksuál ne'e akontese tanba hakarak ho hakarak. Tanba ne'e defeza konsidera arguidu nia aktu ne'e la priense elementu hosi krime tuir artigu 172 KP, tanba ne'e husu ba tribunál atu absolve arguidu hosi krime ne'e.

Desizaun

Depoisde avalia faktu hotu, tribunál konsidera krime ne'ebé akuza hosi prokuradór la priense elementu hosi krime ne'ebé akuza ba arguidu. Tanba ofendida ho arguidu iha relasaun namora no halo relasaun seksuál mós la iha forsa no ameasa. Maibé tanba arguidu ho ofendida nia vidio seksuál viral ona iha facebook, nune'e família mak ezije hodi ofendida apresenta keixa hasoru arguidu. Nune'e bazeia ba faktu la provadu sira ne'e tribunál konklui prosesu no absolve arguidu hosi krime ne'e.

5. Krime koasaun seksuál ho agravasaun

Nú. Prosesu	: 0079/23.PDSUA
Kompozisaun Tribunál	: Koletivu
Juis	: Dra. Patricia Xavier Fatima, Dr. Naason Mário Armindo Marques Doutel no Dr. Samuel da Costa Pacheco
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Pena prizaun tinan 3 suspende ba tinan 3

Iha 12 Dezembru 2024, Tribunál Judisiál Primeira Instánsia Suai prezide leitura akordaun ba krime koasaun seksuál ho agravasaun ne'ebé envolve arguidu JMdJ hasoru ofendida (ho idade tinan 16), iha Munisípiu Ainaro.

Akuzasaun Prokuradór

Prokuradór akuza katak iha 20 Agostu 2023, iha oras tuku 19:00 kalan, ofendida lao ain hosi uma ba ninia tia nia uma atu foti ai-manas. To'o iha estrada sorin ho distansia metro 20, derepente arguidu ho nia kolega hosi oin hasoru ofendida no arguidu tuur iha motor kotuk kaer kedas ofendida nia susun parte loos hodi rasta rezulta ofendida sente moras maka'as. Nune'e ofendida baku ses tiha arguidu nia liman no ofendida hakilar bolu nia aman, arguidu ho nia kolega halai liu ba sira nia uma, ofendida nia aman ho motor halai tuir arguidu to'o iha arguidu nia uma.

Prokuradór akuza arguidu kontra artigu 171 KP kona-ba koasaun seksuál ho moldura penal tinan 2 to'o tinan 6 no artigu 182 KP kona-ba agravasaun.

Produsaun ba prova sira

Iha prosesu julgamentu, arguidu deklara katak faktu ne'ebé akuza ba arguidu ne'e la loos. Arguidu deklara katak momentu ne'eba arguidu ho nia alin atu fila ba uma mak iha dalan motor nia roda kuak, nune'e arguidu ho nia alin dudu motor ba sira ninia uma iha oras besik tuku 21:00 kalan. Bainhira arguidu ho ninia alin to'o iha uma, ofendida nia aman mós to'o iha arguidu nia uma hodi baku arguidu nia alin. Arguidu deklara liután katak lakuñese ofendida, foin hasoru malu bainhira ofendida ba hato'o keixa no hasoru malu iha Edifisiu Polísia mak foin kuñese ofendida. Arguidu deklara mós katak la iha problema seluk ho ofendida tanba suku keta-ketak.

Iha sorin seluk, ofendida kontinua konfirma faktu hotu iha akuzasaun no deklara katak arguidu rasik mak kaer ofendida ninia susun no akontesimentu ne'e iha knua laran lampu lakan no ofendida haree arguidu momós arguidu nia oin.

Alegasaun finál

Prokuradór konsidera arguidu provadu komete krime hasoru ofendida. Mezmu iha julgamentu arguidu nega faktu hotu iha akuzasaun, maibé ofendida konfirma sira hanesan deskreve iha akuzasaun. Tanba ne'e husu ba tribunál atu kondena arguidu ho pena prizaun.

Entretantu, defeza haktuir katak iha julgamentu arguidu deklara katak la kaer ofendida nia susun no momentu ne'eba arguidu la iha fatin akontesimentu no la koñese ofendida. Arguidu foin koñese ofendida iha momentu lori malu ba Edifisiu Polísia. Tanba ne'e husu ba tribunál atu absolve arguidu hosi krime ne'e.

Desizaun

Depoisde avalia faktu hotu, tribunál konsidera arguidu nia aktu ne'e provadu, mezmu arguidu nega katak la kaer ofendida nia susun, maibé ofendida kontinua konfirma faktu hotu iha akuzasaun. Tribunál fiar liu ba ofendida nia deklarasaun tanba arguidu ho ofendida lakuñese malu no arguidu ho ofendida la iha problema.

Bazeia ba faktu provadu hirak ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu no kondena arguidu ho pena prizaun tinan tolu suspende ba tinan tolu.

6. Krime ofensa ba integridade fízika simples ho natureza violénsia doméstika

Nú. Prosesu : 0002/24.MFALS
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Rafael Jeronimo Gusmão
Defeza : Dr. Angelmo Pinto
Desizaun : Pena prizaun fulan 6 suspende ba tinan 1

Iha 10 Dezembru 2024, Tribunál Judisiál Primeira Instánsia Suai, prezide leitura sentensa ba krime ofensa ba integridade fízika simples ho natureza VD ne'ebé envolve arguidu BF hasoru nia feen, iha Munisípiu Manufahi.

Akuzasaun Prokuradór

Prokuradór akuza katak iha 19 Janeiru 2024, iha oras tuku 21:00 kalan, arguidu buti ofendida nia kakorok, rasta iha fu'uk no tuku dala rua iha ofendida nia matan fuku parte karuk rezulta bubu no metan. Antes ne'e, arguidu ho ofendida diskute malu kona-ba bainhira sira nia oan atu fila ba Dili, husu osan ba ofendida no arguidu ofendida husu ba arguidu atu fó osan ba sira nia oan, maibé arguidu hatan katak osan laiha, nune'e mosu agresan ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa totál ba faktu sira iha akuzasaun, arrepende ninia hahalok katak baku feen ne'e ladi'ak, foin primeiravés mai hatan iha tribunál no moris separa ona ho ofendida.

Iha parte seluk, ofendida kontinua konfirma faktu sira hotu iha akuzasaun no deklarata katak depoisde akontesimentu arguidu sai hosi uma hodi moris separa ona ho arguidu.

Alegasaun finál

Prokuradór haktuir katak iha julgamentu arguidu konfesa no ofendida mós konfirma no haree ba kazu violénsia doméstika ne'ebé mak aas, nune'e atu halo prevesaun ba krime refere husu ba tribunál atu kondena arguidu ho pena prizaun suspende ninia ezelesaun.

Entretantu, defeza haktuir katak iha julgamentu arguidu konfesa, arrepende ninia hahalok, foin primeiravés mai hatan iha tribunál no defeza fiar katak sei la akontese tan

krime seluk hasoru ofendida iha futuru. Konsidera katak arguidu ho ofendida moris separa ona, husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguidu buti ofendida nia kakorok, rasta fuuk no tuku dala rua iha ofendida nia matan fukun parte karuk rezulta bubu no metan.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>